

# Bekas pensyarah, imam

■ MOHAMAD FAKHRI MOHD ALI

**ALOR SETAR** – Bekas pensyarah Kolej Universiti Insaniah (Kuin) di Fakulti Tahfiz Wal Qiraat, Syeikh Kadri Abdul Hamid Al Hafiz dianugerahkan sebagai Tokoh Pendakwah sempena sambutan Maulidur Rasul Peringat Negeri Kedah, semalam.

Penganugerahan itu disampaikan setelah mendapat perkenan Pengerusi Jemaah Pemangku Sultan Kedah, Tunku Temenggong, Tan Sri Tunku Sallehudin Ibnu Almarhum Sultan Badlishah.

Pada tahun 1991, Syeikh Kadri yang berasal dari Bukit Besar, Kota Sarang Semut telah dilantik sebagai Guru Maahad Tahfiz Quran (MTQ) Negeri Kedah sehingga tahun 1993.

Beliau kemudiannya diberi penghormatan dengan dilantik sebagai Imam Besar



**Syeikh Kadri (dua, kanan) menerima replika cek bernilai RM3,000 daripada Tunku Sallehudin (dua, kiri), semalam.**

Masjid Zahir pada 1994 sebelum dilantik pula sebagai Pengetua MTQ sekitar hujung tahun 1994 hingga 2000.

Pada tahun 2001, beliau dilantik sebagai pensyarah di

Kuin. Berbekalkan kebolehan dan kelebihan beliau dalam ilmu al-Quran, Syeikh Kadri dilantik pula sebagai Pengarah Institut Al-Quran Darul Aman sejak 2011 hingga sekarang.

Keistimewaan beliau menguasai ilmu al-Quran telah memberi kepercayaan untuk membentangkan kertas kerja dalam forum dan seminar.

Beliau pernah menerima

anugerah Pingat Pangkuan Negara (PPN) pada 1996, dianugerahi Bintang Cemerlang Kedah (BCK) pada 2009, Tokoh Huffaz Hesa pada 2012, anugerah Bintang Kebaktian Masyarakat (BKM) dan Anugerah Kecemerlangan Institut IQDAR pada 2005.

“Sepanjang karier saya selama ini, saya sentiasa berpandu dan mengamalkan dengan berlandaskan al-Quran,” katanya kepada media, semalam.

Pada perkembangan lain, seorang bekas guru, Abdul Razak Saad pula dianugerahkan sebagai Tokoh Imam.

Titik permulaan beliau sebagai pendidik bermula sekitar tahun 1969 sehingga 1987 sebagai seorang guru biasa.

Atas dasar komitmen yang baik, beliau dilantik sebagai Penolong Hal Ehwal Murid di Sekolah Kebangsaan Ayer Puteh, Pendang pada 1987

hingga 1989.

Beliau kemudiannya dilantik pula sebagai Penyelia Pendidikan Islam di Pejabat Pendidikan Kubang Pasu mulai Mei 1989 hingga 1996.

Di awal September 1996, beliau dilantik pula sebagai Penyelia Pendidikan Islam di Jabatan Pelajaran Negeri Kedah sehinggalah Februari 1997.

Abdul Razak juga pernah ditugaskan sebagai Guru Besar sekitar tahun 1997 hingga 2002 di Sekolah Kebangsaan Anak Angkatan Tentera, Tok Jelai, Kepala Batas dan Sekolah Kebangsaan Haji Hassan Tam, Simpang Empat, Alor Setar.

Beliau pernah diberi tangungjawab sebagai Naib yang Dipertua Kesatuan Kebangsaan Guru-guru Ugama Malaysia Barat Cawangan Kedah dan kini menjadi Imam Masjid As-Syakirin, Tokai, Pendang sehingga hari ini.

# diiktiraf